

李文襄公奏疏

李文襄公奏疏目錄

題稿卷之三

督師

恭報招撫情形

龍游蘭谿壽昌報捷

請開復出征將弁住俸

湖協改設守兵

衝屬黃壇口捷功

題補督標前後二營叅將守備

題補黃溫平三鎮遊擊守備

請錄用投誠隨征各官

李文襄公奏疏卷三

請賑難民

李文襄公奏疏卷三

男 鍾麟編次

招撫情形疏

總督浙江等處地方軍務兼理糧餉兵部右侍郎兼
都察院右副都御史臣李之芳謹密

題爲恭報招撫情形仰祈

睿鑒事據援勦金衢總兵官李榮黃巖總兵官鮑虎溫州
總兵官陳世凱叅將范應元等報稱本職奉令勦撫
廣爲開諭今於康熙十三年九月至十一十二等月
陸續招到偽投誠官一百七十餘員兵丁八千餘名

又據衝金嚴紹道府廳縣梁萬禩王宏仁等報稱於
康熙十三年十月至十一十二等月陸續招到投誠
官七十餘員兵丁四千餘名難民三千餘名各備造
花名并劄械細冊申報等因到臣該臣看得耿逆造
亂以來惟恃狡謀煽惑佈散偽劄潛相招引以致廢
革武弁遊手奸民交通從逆展轉勾結嘯聚日多所
以四路防勦在在分兵使闖賊得延喙息臣仰體

皇上靖亂安民寬宥脅從德意出師以來督飭文武將吏
勦撫兼施遐發告示宣揚

上諭聞以自新今官兵所至屢戰克捷賊徒喪膽漸次歸

降自康熙十三年八月以後至今衢金嚴紹等處報到投誠人約計一萬二千餘名招回難民三千餘名烏合之衆漸經解散賊勢日衰自可乘時恢勦各鎮將道府縣以及隨征人員宣布德威招徠撫戢竝著勤勞但今安插事宜正在料理其招撫有功人員并投誠各偽官兵丁花名文冊分別入伍歸農及繳到偽劄俟安插定日容臣逐一查明造冊另疏具

題伏念地方變叛上厯

宸衷仰賴

天威遐震

仁澤覃敷使附從之黨悔悟歸誠賊勢既孤人心愈奮所
有招撫情形臣謹密疏

題報伏乞

皇上睿鑒施行

康熙十四年正月初六日題奉

旨覽卿奏督飭文武將吏各處招撫到投誠人員一萬二
千有餘招回難民三千餘名具見悉心籌畫可嘉有功
人員事平之日議敘具奏兵部知道

龍游蘭谿壽昌報捷疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲塘報捷功事據金協都司僉事陳夢暘臣標守備李和蘭谿縣知縣楊天機等各塘報到臣該臣看得逆賊屯踞龍游蘭谿壽昌交界溪山之內出沒河干阻截糧草臣飭行三縣汛防將弁會合夾剿去後今據報調防龍游臣標守備李和同江南提標把總翟顯等調防蘭谿金協都司陳夢暘臣標隨征都督阮述都督僉事陳義忠等駐防壽昌嚴協千總吳得榮

調入援勦鎮標把總路宗良等各帶官兵會集夾勦於康熙十三年十二月十七日前至白馬地方殺賊五十餘名賊俱遁入黃塘源內十八日進至源口官兵分路衝擊共計殺賊七百有餘擒斬僞都司守備并賊衆共三十九名得獲僞關防僞牌劄等項十九日追至金村源地方官兵分路攻打守備李和奮勇衝上官兵齊進賊卽敗逃追至山門源一路殺賊四百有餘擒斬一十三名焚燬寨柵得獲器械等項又有僞總兵葉十三賊衆屯營下盛村地方蘭谿縣知縣楊天機金協千總喬承明等於康熙十三年十二

月二十日前往追勦擒斬偽總兵葉十三一名殺賊百餘名擒斬十名又有賊寇在大堰頭仙洞源守備李和陳國任等隨征都督僉事陳義忠把總李華等千總吳得榮張元勛等復會齊官兵於十二月二十七日進至大堰頭賊聞風遠遁又撥賊有一千五百餘人遁伏仙洞源溪山官兵分路前進用砲擊死賊衆一百餘人賊棄寨奔逃官兵奮勇衝上追殺七百有餘擒斬二十六名射死偽千總一名各官兵陣獲器械等項具報前來各路官兵奮勇用命屢戰屢捷從此龍游蘭谿餉道漸以寧靜所有在事有功人員

臣謹密疏具

題伏乞

皇上睿鑒施行

康熙十四年正月十三日題奉

旨覽卿奏遣發官兵進剿逆賊於白馬等處地方擒斬甚多焚燬窩棚寨柵得獲偽關防牌劄器械等項擒斬偽總兵具見調度有方將士奮勇可嘉在事有功人員事平之日議敘具奏兵部知道

請開復出征將弁住俸疏

總督浙江等處地方軍務兼理糧餉兵部右侍郎兼
都察院右副都御史臣李之芳謹

題爲營弁隨征勞苦住俸枵腹難支謹

請破格開復以鼓用命事據總兵官陳世凱詳稱據城守
都司僉書張汝第呈據把總徐天平呈康熙十二年
八月二十七日仁和縣義同二畝陳星家失盜一案
把總徐啓呈康熙十一年十一月二十五日於潛縣
衙被盜一案又據江南提標遊擊崔天福詳稱據把
總翟顯呈康熙十二年六月內邾彥勛家失盜一案

各詳請開俸支給等情到臣該臣看得地方城內城外被盜失事專汛兼轄武職各官俱有分別住俸罰俸降級之例但處於平定地方身在汛守定例處分所以責其督緝逸盜今用兵之際或本汛防勦或調遣從征業已披堅執銳力戰疆場豈能復分身以緝失事之盜而征勦之日仍是住俸之日若干總等弁俸銀原屬無多停支既久餬口不給情屬堪憫今據總兵官陳世凱詳稱杭協營把總徐天平先為仁和縣地方陳星家失盜又把總徐啓先為於潛縣衙署失盜俱原經住俸在案今二弁見在隨征金衢地方

屢立戰功詳請開復又江南提標遊擊崔天福詳稱
把總翟顯先爲郝彥勛家被盜住條今該弁調浙援
勦詳請開復前來臣竊議以爲

朝廷設立將弁本爲有事之防如能展績封疆則盡職莫
大於此今終年衝鋒冒刃而不得沾其常祿似宜酌
議變通盜案之功罪雖已立法於平時冀可邀

恩於今日仰祈

皇上睿鑒

勅下部議凡各營將弁除在平定地方無調遣征勦者仍
照定例外其現在用兵之地如經立有軍功或因盜

案住罰者破格開復以示

特恩倘蒙

俞允不獨有盜案之官愈加感激用命卽無盜案之官咸
知

朝廷愛養將士之心無不兢思奮勉矣臣謹具
題伏乞

勅下該部議覆施行

康熙十四年正月十七日題奉

旨該部議奏

湖協改設守兵疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲湖協額兵移調水鄉防禦宜周謹據詳改設守兵船隻以資巡緝事據浙江布政司布政使陳秉直呈詳到臣該臣看得湖協營原額設兵一千二百八十八名於財賦盡糜於兵餉等事案內陸續裁汰兵一百三十一名臣前

題請增兵增馬之時因該營有兵一千一百四十九名亦敷防守是以止議增馬六十五匹及閩逆告變隨

調該營兵六百名赴衢不意去夏湖濱盜賊竊發調
衢之兵未能撤回本地汛守單寡據副將羅映培詳
議暫緩購馬卽以所需每月加餉乾銀募補守兵九
十七名又該營原設快唬船三十隻後經撥入太湖
營一十六隻止存船一十四隻并據該副將詳稱湖
郡一州六縣俱屬水鄉河港交錯巡緝不敷請卽以
買馬價值照原額添造船隻等因前來臣因湖屬正
在會勦需兵甚亟隨卽行令該副將增募起支其添
造船隻復行布政司查議去後今據該司覆稱湖郡
素稱澤國盜賊易於竊發近因鄰封告警巡緝愈宜

周密該營見在船兵實爲不敷如以題增馬匹之餉
乾改募守兵以買馬價值抵作造船料價事屬妥便
且於錢糧亦多節省估計每船一隻核實工料銀四
十三兩三錢四分零計添造船一十六隻共該工料
銀六百九十三兩五錢零造冊呈送經臣覆核無異
前

題准該營增馬六十五匹相應停止如改設守兵九十
七名添造船一十六隻卽以馬價并加餉乾銀抵補
不煩另議錢糧而巡防得有實濟矣除將船隻工料
清冊送兵工二部查核外臣謹會同提督臣塞白理

合詞密疏具

題伏乞

勅下該部議覆施行

康熙十四年正月十七日題奉

旨該部核議具奏

衢屬黃壇口捷功疏

總督浙江等處地方軍務兼理糧餉兵部右侍郎兼
都察院右副都御史臣李之芳謹密

題爲塘報官兵獲捷事據平陽鎮總兵官王廷梅臣標
中軍副將范應元等各塘報到臣該臣看得逆賊屯
踞衢州近郊臣督飭鎮將嚴加堵禦今據報有僞總
兵葉念帶領賊兵五千在南山一帶割營爲賊運糧
臣與平南將軍都統臣賴塔密令總兵官王廷梅副
將范應元等隨同正黃旗夸藍大巴哈正白旗夸藍
大山泰鑲白旗夸藍大噶爾哈兔鑲藍旗夸藍大翁

俄岱等各帶領滿漢綠旗官兵於康熙十四年二月初八日前往黃壇口地方分路衝殺連勝三陣共斬逆賊二千有餘陣斬偽都司千總二名擒斬五十二名餘賊奔潰焚燬賊巢得獲器械偽劄等項具報前來滿漢綠旗官兵用命克捷在事有功人員相應

題報臣謹會同平南將軍都統臣賴塔副都統臣喇哈胡圖合詞密疏具

題伏乞

皇上睿鑒施行

康熙十四年二月十一日題奉

旨覽卿奏會同平南將軍賴塔遣發官兵於黃壇口地方
擊敗賊衆擒斬甚多陣斬偽都司等得獲偽劊器械等
項具見調度有方官兵奮勇可嘉在事有功人員事平
之日議敘具奏兵部知道

題補督標前後二營叅將守備疏

總督浙江等處地方軍務兼理糧餉兵部右侍郎兼
都察院右副都御史臣李之芳謹密

題爲

請增設臣標官兵以資進剿以備經制事該臣看得臣標
添設前後二營應設官員部議令臣

題補奉有

俞旨當此用兵之時將領必得才畧優長經歷戰陣者方
克勝任臣於將弁各員中校量功能廣爲遴選前後
二標應設叅將各一員查有江南狼山鎮標左營遊

擊武榮援勦金華身先士卒所向克捷戰功甚多擬
陞補臣標前營參將嚴協署遊擊管都司事趙得壽
諳練軍務立有戰功擬陞補臣標後營參將應設前
後二營守備各一員查有臣標右營千總郭之賓江
南提標右營千總王昶並才技優長戰功克著郭之
賓擬補前營守備王昶擬補後營守備以上各官年
俸或有未及但俱係立有功績才能堪任仰祈

皇上俯念用人之際

允臣所請以鼓用命則各官愈加奮勉將士共知感勵矣
其前後二營應設千總各二員把總各四員見在遴

選拔補其前後二營添設兵丁見在陸續募補應支
月餉行糧卽於見撥餉內支給

奏銷臣謹密疏具

題伏乞

睿鑒施行

康熙十四年二月十五日題奉

旨兵部知道

題補黃溫平三鎮遊擊守備疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲補授總兵事康熙十三年十一月初七日准兵部密咨到臣該臣看得溫州黃巖平陽三鎮標下三營官員部議令臣

題補奉有

俞旨當此巖疆用兵之時亟藉才能既在本省遴補其征勦立功官員應與年久俸深者一體拔擢以勵勤勞而資任使溫州鎮標應設中左右三營遊擊各一員

查有陞補福建福州城守中營遊擊劉應鳳原係浙
省陞員因無任可到見在守候若以改補銜缺相當
江南提標前營援浙守備馬鳴厚定海鎮標中營守
備傅成俱各軍務諳練立有戰功劉應鳳擬補溫州
鎮標中軍遊擊管中軍事馬鳴厚擬補溫州鎮標左
營遊擊傅成擬補溫州鎮標右營遊擊溫州鎮標應
設三營守備各一員查有錢塘水師營千總王珊俸
久勞深江南狼山鎮標左營千總張居寶撫標左營
千總劉詔才勇出眾奇戰獲捷王珊擬補溫州鎮標
中營守備張居寶擬補溫州鎮標左營守備劉詔擬

補溫州鎮標右營守備黃巖鎮標應設中左右三營
遊擊各一員查有巖協左營都司閻進江南京口前
營援浙守備周鳳巖協右營守備黃成富戰守咸宜
軍功並懋閻進擬補黃巖鎮標中營遊擊管中軍事
周鳳擬補黃巖鎮標左營遊擊黃成富擬補黃巖鎮
標右營遊擊黃巖鎮標應設三營守備各一員查有
巖協右營千總楊春茂巖協左營千總周文撫標右
營千總杜承蔭屢次征勦並有功勤楊春茂擬補黃
巖鎮標中營守備周文擬補黃巖鎮標左營守備杜
承蔭擬補黃巖鎮標右營守備平陽鎮標應設中左

右三營遊擊各一員查有撫標左營守備高祿撫標
右營守備陳國任毒戰當先勇畧昭著與紹協左營
守備傅鵬翔皆援剿金衢等處屢立戰功高祿擬補
平陽鎮標中營遊擊管中軍事陳國任擬補平陽鎮
標左營遊擊傅鵬翔擬補平陽鎮標右營遊擊平陽
鎮標應設三營守備各一員查有湖協左營千總李
世龍湖協右營千總朱有才歷著軍功嘉興右營千
總李鼎俸深才練李世龍擬補平陽鎮標中營守備
朱有才擬補平陽鎮標左營守備李鼎擬補平陽鎮
標右營守備以上各官內有銜俸未及者俱係久在

疆場奮勇立功才技優長膽畧可任仰祈

皇上允臣所請以鼓用命至於擬補守備各千總履歷因
各身在行間見在查取另咨送部外臣謹密疏具

題伏乞

睿鑒施行

康熙十四年二月十五日題奉

旨兵部知道

請錄川投誠隨征各官疏

總督浙江等處地方軍務兼理糧餉兵部右侍郎兼
都察院右副都御史臣李之芳謹

題爲投誠効川官員隨征立功

請議錄用以昭鼓勵事竊惟投誠各官分發標營効用者
原有俟立功績具題補用之例查今順治七年至康
熙六年陸續在浙投誠并外省移駐共授劄官一百
四十七員蒙

恩給俸已歷多年今自用兵以來其中儘有才力強壯感
激圖報隨征防勦著立勞績者似應與見任各官一

體遇缺

題補以鼓用命但浙省係沿海地方投誠例不補用而各官展効疆場必早得實授庶足以示鼓舞仰祈

皇上睿鑒

勅部酌議凡投誠官員功能昭著者應否不拘常格遇有本省員缺量才

題補或以不便逾例准將立有軍功之員具題到部候於別省員缺推用臣謹具

題伏乞

勅下該部議覆施行

康熙十四年二月十五日題奉

旨兵部議奏

請賑難民疏

總督浙江等處地方軍務兼理糧餉兵部右侍郎兼
都察院右副都御史臣李之芳謹

題爲

請賑被難饑民以廣

皇仁以安地方事據衢州府知府王宏仁詳稱竊照民爲
邦本處兵荒之地設不綏輯本處人民使之散四方
填溝壑卽寇滅地寧必至有土無人故爲今日計不
惟勦賊爲亟更宜安民爲先衢州自康熙十三年四
月以後屬縣四處屯賊男婦朝夕避遷不遑寧處及

至江常開三縣被陷近彼界者不得不退入西安自
十月以來目擊扶老挈幼被露河干哀鴻慘狀真堪
腸斷因與西安縣知縣李呈禎公同相視府城朝京
門外龔家埠一帶地曠土平且附近城郭隨各捐給
簞木搭蓋棚廠招集避亂男婦暫爲安插復出示招
徠數日之間聚至數千奈衢地水旱頻仍禾麥不及
半收更遭賊寇焚劫一空逃難之民實無半粟旦夕
莫支奉本部院檄示諄諄諭令賑濟首蒙捐銀三百
兩卑府亦兩次捐穀三百石一面行令西安縣增搭
棚廠按名安插分賑一面查明戶口開造清冊隨據

該縣送冊前來界府卽爲通詳奉批在案然此止據以前見在者而言至歲暮難民愈多前報之冊共一千六百六十一戶計入千六百三十一丁口後報之冊共二百五十一戶計一千八十五丁口前後共計一千九百一十二戶九千七百一十六丁口惟是交春之後民食益艱流民益衆捐賑有心接濟無力不得不詳請本部院先爲設法勸輸再爲具

題請賑等因隨行隨征福建布政司并浙江布政司酌議去後據布政使李士楨詳覆到臣該臣看得金衢台嚴紹等處賊寇屢經征勦附從烏合之徒漸以解

散投誠衆多臣已飭行各地方官安集難民加意撫綏使復故業但賊寇蹂躪之地田間收穫盡爲盜糧廬舍被焚衣貨罄劫一望蕭條啼號載路卽如衢州自逆賊屯踞山鄉其良民不肯從賊者扶老挈幼奔赴近城地方依棲郊野身無完衣日無半菽顛連困苦不忍見聞今據衢州府冊報見有九千七百餘名口其餘散處各鄉者尚不可計數臣與府縣官雖捐貲量給不過涓滴之微何能有濟且投誠之人方絡繹來歸卽照籍安插而赤身無業者居多若不仰懇天恩亟籌拯恤則老幼疲瘵必將轉於溝壑而壯者糊口

無資勢不能坐以待斃恐復滋隱憂故於今日而議賑濟實安攘之急務也臣行查常平倉穀爲數無幾又行布政司酌議據詳有請爾漕糧勸諭捐輸及於買到大兵糧米內動支三款臣思當此軍興之際支費浩繁漕糧係

天庾重計兵米係轉餉急需俱不便輕議惟捐輸原有定例但今現行捐助軍需事例其數比賑荒減少誰肯舍寡就多恐徒託空言無裨實濟臣身在地方目擊飢寒之民安敢不思長策查湖廣撫臣張朝珍廣開賑濟事例等事一疏荷蒙

恩旨勅部覆議將湖北地方官士人民因資助兵餉捐助
納監銀米豆穀之內酌量賑濟足見軍需與民命交
重特蒙

宸衷軫恤今浙東被難百姓係兵火之餘更非湖北地方
驚避失業者可比仰祈

皇上睿鑒或照湖廣例卽於捐助軍需銀內酌量動支或
將賑荒事例與資助兵餉一例減數捐納如蒙

俞允其應賑地方并賑給數目臣等自當詳加斟酌選委
賢能官員按名散給俾窮黎得沾實惠則嗷嗷之衆
可無輕生走險之虞地方得以寧謐矣臣謹會同總

理糧餉侍郎臣達都撫臣陳秉直合詞具

題伏乞

勅部議覆行臣等遵奉施行

康熙十四年二月十五日題奉

旨該部議奏

李文襄公奏疏卷三終

李文襄公奏疏卷三

請賑難民

李文襄公奏疏目錄

題稿卷之四 督師

龍游遂安處州等處獲捷

金衢處三郡捷功並復宣平縣

衢州龍游獲捷

請卹殉節縣丞徐喆

軍中需用賞賚餉銀

衢州南塘萬青前嶺捷功

請開銷賞給官兵銀兩

送歷年獲捷軍功冊

報明得獲逆書

招撫衛台溫處四府僞員

招撫僞總兵侯晉爵等投誠

議水師提督駐劄管轄事宜

李文襄公奏疏卷四

男 鍾麟編次

龍游遂安處州等處獲捷疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲彙報捷功事案據臣標守備李和等塘報各到臣該臣看得金衢連界各山賊寇不時出沒臣與將軍臣賴塔調度搜勦據防守龍游縣臣標守備李和撫標守備陳國任龍游縣知縣盧燦防守杜澤地方臣標隨征官張文福等屢次搜勦各有斬獲不等其嚴

州一路黃巖總兵官鮑虎率領官兵於遂安地方連
勝四陣斬擒偽參將守備等員斬賊一千五百有餘
招撫偽都司守備千把五名賊衆一百二十三名今
大將軍和碩康親王調度援勦總兵官李榮溫州總
兵官陳世凱等隨同三等台吉察渾副都統馬哈達
率領滿漢綠旗官兵恢復永康縉雲陣斬偽守備一
名賊衆一千有餘擒斬五十四名又連奪崖頭桃花
二嶺殺賊五百有餘擒斬二十五名招到偽遊擊一
名逆賊望風逃遁隨卽克取處州府得獲砲藥等項
又撫標遊擊田萬侯等隨同噶喇昂邦希福率領滿

漢綠旗官兵恢復武義前至苦竹郭洞下楊寨等處
地方三次殺賊獲械各具報前來各路官兵奮勇
命勦賊恢復屢戰屢捷除滿洲官兵功績候大將軍
親王具

題外所有在事綠旗有功人員相應彙疏

題報臣謹會同平南將軍都統臣賴塔合詞密疏具
題伏乞

皇上睿鑒施行

康熙十四年二月十八日題奉

旨這彙報捷功事平之日察明議敘具奏兵部知道

金衢處三郡捷功并復宣平疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲塘報衢處等處官兵堵剿捷功事據臣標守備李和衢協副將李承恩防守湯溪縣守備劉君明撫標遊擊田萬侯援勦金衢總兵官李榮平陽總兵官王廷梅等各塘報到臣該臣看得衢金交界逆賊潛踞淡山出沒窺伺臣飭行汛防官弁勦禦據防守龍游守備李和陳國任把總蘇得功李才等三次搜勦共擒斬賊寇一千二百餘名焚燬木城得獲砲械等項

防守湯溪把總胡海等亦有斬獲其處州府恢復之後撫標遊擊田萬侯等進勦宣平斬賊二千三百六十餘名生擒偽都守等員并賊衆一百一十餘名焚燬賊巢恢復宣平又總兵官李榮陳世凱等會同副都統馬哈達三等台吉察渾等於處郡城外截殺賊兵渡河衝擊斬賊五百餘名擒斬偽叅將都守千把等十六員得獲砲甲等項賊衆敗遁其衢州府逆賊屯踞河西官兵列營堵禦先於繆村地方擁衆渡河副將范應元等同鑲黃旗夸藍大禪布等先後率兵救援殺賊甚多賊又分兵直犯航埠總兵官王廷梅

等飛馳策應斬賊一千餘名賊兵奔回河西隨將綠
旗兵與滿兵合營連旬對壘堵禦賊又分佈偽總兵
郭二等劄管礮底等處以出我兵之後兩路聲應冀
圖前後夾攻臣會同平南將軍都統臣賴塔密遣守
備薛受益隨征外委都司王文魁等連夜進兵官兵
衝擊奪險連勝三陣共斬賊一千餘名踏平賊營數
座得獲砲械等項焚燬賊寨糧米收回難民子女隨
卽查給還民各路官兵奮勇用命破賊獲捷所有款
旗在事有功人員相應

題報臣謹密

題伏乞

皇上睿鑒施行

康熙十四年四月初三日題奉

旨據奏衛金宜平處州等處地方各路官兵屢次擊敗賊衆焚燬賊巢得獲砲械等項具見調度有方將士奮勇可嘉有功人員事平之日議敘具奏兵部知道

衢州龍游獲捷疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲彙報官兵獲捷事據平陽總兵官王廷梅臣標調防龍游守備李和隨征外委都司張文福等金協副將牟大寅等督標署千總李華等調防湯溪守備劉君明等各塘報到臣該臣看得逆賊屯踞衢郡隔河又分佈賊黨各處窺犯臣屢飭行鎮將并汛防官弁多方偵勦去後又據平陽總兵官王廷梅報據署遊擊高祿等於大埂余村上葉地方連勝三陣共斬賊

三百餘人守備李和龍游縣知縣盧燦等以護送糧船爲名暗伏官兵星夜前進連破木城五座直抵上路源賊巢斬賊五百七十餘名生擒僞總兵繆國英并僞守備姜龍查繆國英係衢州首先倡亂從逆之賊流毒地方最淡一旦就擒人心共快臣隨會同平南將軍都統臣賴塔審明正法訖又於山門廟地方斬賊數十餘人生擒僞守備一名又臣標隨征外委都司張文福等於峽口大頭小伸漆木等處地方連日搜剿斬獲甚多擒斬僞守備等員又賊首包大生等劄巢湯溪吳董包地方大將軍和碩康親王遣發

金協副將牟大寅福建督標參將裴天祿等前往撲
勦連獲五捷共計斬賊一千餘人殺死偽守備把總
等員生擒賊衆三十餘名焚燬木城寨口二十層又
於周寮地方勦殺餘賊二百餘名生擒九名又調防
湯溪守備劉君明知縣張元會等於黃塘托山小龍
橋地方連勝三陣共殺傷賊衆六百餘人陣斬偽都
司守備等員奪獲器械偽劄等項各路綠旗官兵奮
勇用命勦賊獲捷所有在事有功人員相應彙疏

題報臣謹密疏具

題伏乞

皇上睿鑒施行

康熙十四年四月二十五日題奉

旨據奏鎮臣王廷梅等於衢郡等處地方各路官兵屢敗
賊衆生擒偽總兵繆國英等得獲偽劄器械等項具見
官兵奮勇可嘉在事有功人員事平之日議敘具奏該
部知道

請卹殉節縣丞疏

總督浙江等處地方軍務兼理糧餉兵部右侍郎兼
都察院右副都御史臣李之芳謹

題爲縣丞死節堪矜謹

請優卹以勵忠誠事據浙江布政司布政使李士楨呈詳
查得署武義縣事蘭谿縣縣丞徐喆任事未及一月
賊寇臨城被賊逼脅抗節不辱絕食自縊此誠捐軀
報

國殉難全忠今據該道府縣確看相符擬合轉詳本部
院俯賜

題請優卹以慰忠魂以彰臣節者也至於歸櫬乏資除
經本部院捐助外本司遵奉院批亦捐銀二十兩又
經移行各司道共襄捐助等因到臣該臣看得金華
府之武義縣逼近處州臣先經塘報逆賊突犯追奪
縣官印信情形業經密疏

題報隨據金衢道詳據署武義縣事蘭谿縣丞徐詰
生母梁氏呈控伊子殉難自縊當批布政司確查去
後茲據詳覆前來臣查康熙十三年六月二十日賊
臨武義防守逆弁張奇章從叛內應署縣事蘭谿縣
縣丞徐詰衆寡不敵被擄奪印又欲逼降本官矢志

絕食於七月初三日忠憤自縊念此末員乃能通曉
大義拒賊不屈捐生殉難誠爲可憫相應題

請優卹以慰忠魂臣謹會同總理糧餉侍郎臣達都撫臣

陳秉直合詞具

題伏乞

勅部議覆施行

康熙十四年五月十六日題奉

旨該部議奏

軍中需用賞賚餉銀疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲軍中有刻不可少之需動帑有萬不得已之勢謹

據實上陳仰祈

睿鑒事竊惟臣以一介庸愚荷蒙

皇上知遇洵加超擢威戴

天恩無由報稱自蒙

簡畀封疆重任正臣竭力効命之時上年忽值逆賊告變

所在震驚人無固志臣本書生未嫻軍旅惟以大義

感激衆心然將弁兵士皆驅使於鋒鏑之間非有信賞何以鼓勵如遣調官弁多有貧乏不能製辦軍裝者欲令其奮勇赴敵不得不賞其有衝鋒破陣征勦立功者以一勸百不得不賞且酷暑奇寒枕戈擐甲不得不勞以牛酒被傷者不得不予以醫藥陣亡者不得不加以棺殮以至賊徒率衆投誠旌給袍帽兵民擒獻賊黨激賞銀牌等項無一事之可遺無一次之可省非賞不勸非銀不行臣常俸之外惟取給於己貲柰家鄉既遠且本無儲蓄當聞變之始卽售產揭借多方措備然實不能源源接濟身在軍中事機

迫切遂於餉銀內暫行借支非不知錢糧不宜擅動
欲行

題請則不敢以無例之事上瀆

加聰欲思節省則不敢以用人之時坐墮衆志是以冒昧
動支此臣愚拙苦悵惟知爲封疆大計藉此鼓舞人
心實未敢瞻前顧後慮貽誤事機也查於康熙十三
年三月十七日發解閩餉十五萬兩於三月二十一
日起行及三月二十九日聞變臣卽星夜差千總沈
澤標員王國棟飛馳前往於浙閩交界處所追回因
留銀六萬兩於衢州原備兵餉支用內有已發衢州

府給餉者自應歸款清算尚有在預給通省滿漢官兵一月俸餉之內者另疏會

題又有招募新兵預給資糧已於月餉內扣還司庫其餘有係臣軍中於前項支用者絲毫皆係公帑應臣自爲清理惟因貲產有限未能一時補還致有懸缺不敢不據實

題明伏乞

皇上俯鑒因公動用萬非得已賜寬限期俟臣從容措補若以賞卹官兵仰荷

天恩許臣造冊報部核銷是則破格

隆施非臣之所敢望也臣謹密疏具

題仰祈

睿鑒施行

康熙十四年五月廿六日題奉

旨該部議奏

衢州南塘萬青前嶺捷功疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲塘報官兵獲捷事據臣標後營叅將趙得壽報稱僞驍騎將軍馬九玉統領賊兵劄營下洲園林水閣一帶兼顧江常又於溪口湖南大溪灘茅村東南兩地立四大賊營以爲應兵復於東南總路前嶺地方設立賊營爲東南各賊巢接運糧料遞送軍情一遇我兵進剿下洲溪口等處之賊卽爲應援本年五月內連旬大雨平地瀰漫蒙本部院暨平南將軍籌算

天時地利密傳衢州府知府王宏仁面諭前嶺賊營
居高山之上倚各處爲聲援今河水泛漲焉能飛渡
乘此兩夜進兵賊必失防可以進剿隨令該府密差
投誠官吳文遠揆明路徑隨蒙本部院平南將軍酌
撥正白旗叅領白思胡蘭鑲白旗叅領徐爾景正紅
旗叅領強什庫帶領滿兵令卑職帶本營兵五百名
同本營守備王昶等又衢州城守副將李承恩遣發
都司李可陞等帶兵二百名又帶左營都司許鳴鸞
下家丁把總王富領馬步百名及知府王宏仁挑選
家丁令投誠官吳文遠等帶領衢州府鄉兵三百名

引路復奉本部院平南將軍軍令不許搶擄婦女騷擾百姓卑職逐一傳諭於本日戌時一同出城至次日黎明到南塘地方卑職會同滿洲官兵分爲三路與賊交鋒殺賊一百餘人活擒一十一名又過河到萬青將村子圍住與賊交戰殺賊二百餘人活擒二十一十一名又至前嶺賊兵倚山嶺之險於崖下處用巨木爲城有賊千餘列陣對敵我兵馬齊上陣殺四百餘人活擒三十二名賊兵退奔卑職本營官兵帶領衢州府鄉勇從後路回擊賊營賊兵大敗職等又同滿洲官兵綠旗官兵四分裹殺賊無去路落水倒崖

死者不計陣獲軍器等項共二百一十六件等情到
臣該臣看得逆賊屯劄前嶺地方各路賊巢互相應
援今連旬天雨河水泛漲各處賊巢不能首尾接應
臣與平南將軍都統臣賴塔商議隨即密發正白旗
叅領白思胡蘭等臣標後營叅將趙得壽守備王昶
等於康熙十四年五月二十四日南至南塘萬青前
嶺等處地方官兵分路奮勇衝殺前後共計殺賊七
百餘名活擒六十四名擒斬偽都司千把總等員得
獲偽劄砲械等項具報前來除將偽都司何應龍等
審明梟示訖其餘審係陷賊地方百姓隨給發招撫

告示遵照安輯以廣

皇仁外所有滿漢綠旗官兵出奇襲擊奮勇用命大創賊氛其在事有功人員相應

題報臣謹會同平南將軍都統臣賴塔副都統臣喇哈合詞密

題伏乞

皇上睿鑒施行

康熙十四年閏五月初一日題奉

旨覽卿奏會同將軍賴塔遣發滿漢官兵擊敗南塘等處逆賊擒殺甚多陣斬偽都司等得獲偽劄器械等項具

見調度有方將士奮勇可嘉在事有功人員事平之日
議敘具奏兵部知道

請開銷賞給官兵銀兩疏

總督浙江等處地方軍務兼理糧餉兵部右侍郎兼
都察院右副都御史臣李之芳謹密

題爲賞給官兵銀兩仰懇

天恩特賜開銷以鼓兵心事據浙江布政司布政使李士
楨詳稱案爲動支正項錢糧整備防禦器具事奉本
部院案驗康熙十三年五月十四日准戶部密咨內
開浙江清吏司案呈奉本部送奉

御前發下紅本該本部密覆浙撫出逢吉題前事等因康
熙十三年四月二十二日題奉

旨戶兵工三部會同速議具奏欽此欽遵於五月初四日
密封到部該臣等會議得浙撫田逢吉會同總督李
之芳密疏稱杭城係省會重地城樓城門窩舖垛口
砲臺砲架箭牌插木及各處軍火鉛彈等項理應備
辦將士犒賞此皆今日之急需斷斷不容已者理應
動正項錢糧一面動支錢糧整理等因具題前來查
原一應城樓垛口並無動用正項錢糧修造之例其
康熙十二年浙省軍器火藥等項具題修造在案此
修造軍器火藥並不會用相應將修造城樓垛口軍
器等項之處俱無庸議如將士立功理應犒賞無功

之人不便濫賞如有立功之人彼時備賞可也康熙十三年五月初六日題本日奉

旨依議速行欽此密封到部移咨到院行司又奉前任田撫院案驗准戶部咨同前由行司奉此除軍火器械修造城樓等項另詳外該前司查得賞賚一項先因閩寇告變兩浙震驚所賴各營將士用命荷蒙會議無分滿漢官兵賞賚一月俸餉雖屬鼓勵士心實因封疆起見今奉部文如有立功之人彼時備賞無功之人不便濫賞但所賞之銀久經奉文給發茲若必待有功之人賞給則前銀勢必照數扣追恐失

朝廷愛養德意更隳士卒奮勇苦心此實斷斷不可行者

所有賞給銀兩造具清冊見在合無再請俯賜

題請准給以便報銷否則惟有懇批各營餉內扣算以
補歲額統祈裁示以便遵奉等因詳奉總督李部院
批仰新任布政司再加酌議仍候部堂撫院批示錄
報冊暫存又奉達侍郎批仰候督撫二院具

題送部冊發回又奉陳撫院批仰候各部院批示具報
冊存今該本司布政使李士楨看得康熙十三年三
月間突遭閩逆背叛侵入浙境彼時訛言四播兵心
渙散毋論金衢嚴處等府卽省會重地亦岌岌乎有

不可保之勢幸蒙將軍督撫各院謀深慮遠遂將滿漢官兵加賞一月俸餉使從征者有裹糧之需戍守者免交譴之歎於是兵馬到衢而衢州獲堵禦之力兵馬到金而金華奏屢捷之功兵馬到台而台州免潰亡之患是收拾渙散之兵心保固旣危之封疆實賴此加賞一舉在各院止知爲

朝廷封疆起見實萬不得已動支此項金錢也伏讀

上諭逆賊吳三桂耿精忠背恩反叛浙江綠旗官兵及江西袁州贛州綠旗官兵奮勇効力勦殺逆賊固守地方
漢爲可嘉理應議敘以褒勤勞作何加恩之處爾部速

議具奏欽此部覆行查効力兵丁造冊送部加恩賞賚
曉諭軍士莫不懽聲雷動是各院加恩之舉渙有合
於

宸衷今若拘執不便濫賞之議在失陷者固不可追傷亡
者亦不可問勢必將現在官兵俸餉扣抵以本司計
之即使賊氛已盡掃除地方已盡恢復太平有象亦
且不可而况乎官兵正在戮力行間之日一旦扣追
寧保其必不解體抑且大背

加恩之典伏乞本部院特疏

題明允其加賞庶將士感沐

皇恩益思効力疆場所損於數萬之餉銀者小所裨於
朝廷之封疆者大也等因詳奉達侍郎批上年耿逆叛變
之後正將士用命之秋若非賞賚何以鼓勵士心今
欲一旦行追不但疆場戮力之窮兵難扣忍亦非
上諭加恩之盛意仰請兩院特疏具

題又奉陳撫院批仰候督部院主稿會

題冊存查奉此合將批示一併錄報伏候本部院亟賜
主稿會

題等因到臣該臣看得逆賊倡亂以來官兵荷戈征勦
一載有餘仰賴

皇上天威屢奏捷功漸次恢復蕩平有期在將士奮勇當
鋒同心報

國實著忠勤亦資鼓舞先經原任撫臣田逢吉將支給
賞兵銀兩具

必部議兵丁有功應賞無功不應濫賞如有立功之人
彼時給賞可也奉

旨移咨在案但上年逆警初聞人心搖動實有叵測之勢
臣責重憤深與已故將軍圖刺原任撫臣田逢吉夙
夜籌畫有可以固結軍心裨益封疆者行之惟恐後
時公議通省滿漢綠旗官兵俱預給俸餉一月諭以

勉力立功卽作賞賚不於月餉扣除隨於上年四月初三日遍發告示宣布

朝廷養士之恩激勸忠孝大義通行支領一時踴躍歡呼士氣從此大振嗣因部議不准動支既不敢請銷又無從抵補屢行布政司酌議若不

題請開銷必須扣除月餉但當此用兵之際將士衝鋒冒刃出死力以捍疆圉咸有邀

恩過望之念如將已給之賞復行扣除所省於公帑者小而所係於兵心者大臣等會同商酌不得不剴切籲

陳仰懇

天恩俯念倉卒震動之時賴此鎮定人心實爲封疆起見
權宜急著非常格可拘特宏

曠典准予開銷庶使用命之士共沐

恩施愈感激報効以副

朝廷愛養之意除冊送部查核外臣謹會同撫臣陳秉直

合詞密

題伏乞

皇上睿鑒施行

康熙十四年六月初八日題奉

旨該部議奏

送歷年獲捷軍功冊疏

總督浙江等處地方軍務兼理糧餉兵部右侍郎兼
都察院右副都御史臣李之芳謹密

題爲欽奉

上諭事康熙十四年正月二十七日准兵部咨文到臣准
此臣隨通行各鎮協標營造冊去後茲據呈送前來
臣遵皆逐案查明現在彙冊送部外該臣看得上年
耿逆倡亂賊寇四起全浙震動人無固志臣荷
特恩謬肩重寄凡可以感激忠義固結人心者晝夜圖維
不敢少遺餘力一面宣布

朝廷綦養官兵德意鼓勵用命以膺懋賞臣隨統兵赴衛
抵拒賊衆幸賴各將士咸思感奮調發恢勦所向立
功嗣後奉命大將軍和碩康親王寧海將軍固山貝
子到浙以來軍聲益振屢報捷功伏蒙我

皇上軫念綠旗官奮勇効力勦殺逆賊固守地方特奉

上諭議敘加恩臣接准部咨先行曉諭無不踴躍歡呼共
矢捐糜以圖報効今據該鎮協標營造報前來臣再
加彙核除已經議敘官不行開列并各標管受傷及
陣亡官兵見在詳查另冊具

題

請卹所有奉

旨事平議敘各案在事文武有功人員并効力兵丁數目

逐案查明備造清冊除冊揭送兵部查核外相應

題報再查尙有見在具

題未經奉

旨准咨者亦有已經奉

旨見在移行確查造冊尙未覆到者容臣續造清冊徑送

兵部查核相應一併

題明伏乞

皇上睿鑒施行

康熙十四年六月初八日題奉

旨該部知道

報明得獲逆書疏

總督浙江等處地方軍務兼理糧餉兵部右侍郎兼
都察院右副都御史臣李之芳謹密

題爲題明事竊照逆賊竄伏河西官兵列營堵禦糧甲
荷戈晝夜對壘內有壓潮營盤逼臨河下今於康熙
十四年六月二十三日三更時候逆賊挑選精銳擁
衆渡河逼犯壓潮用火箭火礮等項直向我營攻打
我官兵砲矢齊發奮勇用命逆賊三次進攻三經敗
潰我官兵依路搜勦活擒逆賊二名見有竹竿一根
埋豎道傍竿首劈開夾置偽書一封隨經官兵將所

擒活賊并偽書解赴臣前臣見偽書封面上寫總督部院李密展字樣閱之不勝髮指隨即會同平南將軍臣賴塔并集道府廳各官公同拆閱係耿逆下偽驍騎將軍馬九玉書內開前承密札上順天心下救民命此天地父母之盛心也第偃戈息鼓拱俟指南不意曠日遲久金玉爾音使第望之若渴等語臣惟逆賊狂悖上干

天討臣嚴督官兵分頭勦禦屢奏捷功今賊計無所出復爲此煽惑之詞陰圖反間臣不勝撫膺憤激謹具密疏

題明伏乞

皇上睿鑒施行

康熙十四年七月初一日題奏

旨兵部知道

招撫衢台溫處四府僞員疏

總督浙江等處地方軍務兼理糧餉兵部右侍郎兼都察院右副都御史臣李之芳謹密

題爲恭報招撫情形仰祈

睿鑒事竊惟閩逆叛變以來衢台溫處地方賊寇四佈兼以狡謀煽惑分散偽割潛相招引曠聚日繁臣謬膺地方重寄晝夜區畫調度官兵多方勦禦幸賴各路將士感奮用命屢著捷功今衢州賊勢日見窮蹙殄滅可期且自寧海將軍固山貝子統率各標營將士恢復太平大荆樂清黃巖等處地方併克取永嘉青

田現與處州官兵會合直抵溫州軍聲大振第念賊
中有脅從之官兵有被賊搶掠流離失陷之難民仰
體

皇上勦撫並用至意遍張曉諭宣布

朝廷浩蕩宏恩一面飭行鎮將道府各官開誠諄諭并差
隨征員役人等齋示多方招撫使賊黨渙散除前經
題報金嚴紹等處招撫投誠僞官兵一萬二千餘名難
民三千餘名外今衢屬又招到僞總兵副將以及僞
叅遊都守千把等官共一百八十餘員僞兵弁投誠
人等共三千四百餘名難民共一萬二千餘名口合

屬招到偽總兵都督副將叅遊都守千把等官共三十餘員偽兵投誠人等共四百餘名難民共三萬四千九百餘名口又溫屬招到難民共計二萬五千八百餘名口又處屬招到偽總兵遊擊都司守備并陷賊各官共五十餘員偽兵投誠人等共七百餘名難民共四萬四百餘名口見在分別賞給銀米袍帽曲加撫慰其中有願食糧者卽發營入伍有願歸農者卽交有司安插除將招撫有功人員并投誠花名細數咨候另造清冊咨送兵部外伏念逆賊狂逞上厯

宸衷今賴

天威遐震地方漸復歸誠日多所有招撫情形合先密疏
題報伏乞

皇上睿鑒施行

康熙十四年十一月初九日題奉

旨覽卿奏督飭文武各官開誠齋示招撫衛台溫處四府
偽總兵等官二百餘員兵丁四千餘名難民十一萬餘
名具見悉心籌畫勦撫竝用可嘉有功人員事平之日
議敘具奏兵部知道

招撫僞總兵侯進爵等投誠疏

總督浙江等處地方軍務兼理糧餉兵部右侍郎兼
都察院右副都御史臣李之芳謹密

題爲僞官向化歸誠并供報閩逆情形仰祈

睿鑒事據分守嘉湖道趙之彪呈詳到臣該臣看得逆賊
耿精忠背

思反叛以來惟恃佈散僞劄招集亡命爲煽惑人心之計
今有僞總兵侯晉爵侯大經傾心向化并繳招兵僞
劄赴臣軍前投誠臣隨發嘉湖道查詢確實去後今
據詳覆前來臣覆加親問據供借散劄爲名潛出逆

境故得間道來歸且備述耿逆餉區民愁苛法暴斂
情形甚悉則是逆賊罪惡貫盈授首有期所據供吐
情詞擬合

題報至偽總兵侯晉爵侯大經不甘從賊帶劄翰誠立
志可嘉聽部議敘以爲向化之勸除將繳到偽劄送
部驗燬外臣謹密疏具

題伏乞

皇上睿鑒施行

康熙十四年十一月初九日題奉

旨覽卿奏偽總兵侯晉爵侯大經傾心向化繳劄投誠可

嘉著議奏該部知道

李文襄公奏疏卷四

招侯進賢

十七

議水師提督駐劄管轄事宜疏

總督浙江等處地方軍務兼理糧餉兵部右侍郎兼都察院右副都御史臣李之芳謹

題為補授提督事康熙十四年十月二十八日准兵部咨開職方清吏司案呈奉本部送兵科抄出該本部題前事內開該臣等議得議政王等會覆奉命大將軍康親王題疏內稱原任水師提督常進功雖諳練船務見無職任不便管轄他人之兵等語相應將常進功授為浙省水師提督等因具題奉

旨常進功投為浙省水師提督欽此今常進功既投為水

師提督應兼職銜查常進功原係右都督充廣東水師提督總兵官任內有降四級照舊管事有軍功紀錄一次於康熙六年十一月軍政自陳雷拜他喇布勒哈番又一拖沙喇哈番革去提督總兵官在案今常進功應准以署都督僉事充浙江水師提督總兵官俟

命下之日咨行該督將該提督管轄事宜并駐劄地方妥議具題到日揭請

內閣撰給

勅書其印信應咨禮部鑄給可也等因康熙十四年九月

十三日題本月十五日奉

旨常進功着以署都督僉事充浙江水師提督總兵官餘
依議欽此移咨到臣該臣看得浙江自耿逆變叛勾連
海寇入犯亟藉舟師策應致蒙奉命大將軍和碩康
親王以提督臣常進功諳練船務具題奉

旨授爲水師提督部議將管轄事宜駐劄地方行臣妥議
具題臣查浙省當日原設有水師提督駐劄寧波統
轄溫台沿海水師兵將節制左右二路總兵官今日
水師提督有應援進勦責任其駐劄地方必須扼險
可以兼顧策應又宜便於操演舟師之地查定海爲

全浙門戶見在戰船俱灣泊蛟關以之駐劄其地居重馭輕督率舟師控制溫台聯絡聲援甚爲利便惟是旣設水師提督若不設專統標旅非惟各汛將士呼應不靈卽配船出洋亦非素所練習如欲從新添募又未免加增糧餉臣再四籌酌定海向設總兵官一員今該鎮朱萬化業已告病乞休臣

題明在案合無請照江南崇明改鎮爲提之例議將定海鎮標官兵改爲水師提標其營制應照當日初議水師提標分爲中左右前四營其兵數應照當日原設水師提標規制中營設兵一千名左右前三營各

設兵八百名共需兵三千四百名除定海鎮見有額兵三千三百名外止須募兵一百名而水師標旅已成是兵不別募餉不多增已收駕輕就熟之效矣若戰兵水手俱照戰三守七之例於四營內均勻派撥以資操駕攻擊至於管轄事宜查水師提督統轄台溫沿海一帶兵將專管防守地方勦禦賊寇提調兵馬考覈水師武職賢否并一切軍務其見在黃溫二鎮向俱設有戰艦近雖船隻失陷但水陸均有責成除陸汛營務應令黃溫二鎮咨商陸路提督會臣等查酌行外凡溫台沿邊舟師事宜亦令黃溫二鎮馳

咨水師提督會臣酌妥而行如有需用官兵配船進
勦之處又當臨期的調黃溫二鎮官兵配船出洋以
資勦擊若夫提標四營應設叅將一員遊擊三員守
備四員千總八員把總一十六員候部覆奉

旨俞允之日當卽改設將領中遴選具

題請頒給叅將關防并換給營制各官劄付至陸路提
督駐劄寧波與定海相隔不遠但陸路提督管轄陸
路將領水師提督專管水師官兵分轄各有不同彼
此原無牽制且當此多事之特征討應援居處不常
應俟事平之日另行酌議相應一併聲明臣謹具

題伏乞

皇上睿鑒

勅部議覆施行

康熙十四年十二月初四日題奉

旨該部議奏

李文襄公奏疏卷四終